

Date – 28/05/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram mamawh buaipuia Delhi-a cham mek Chief Minister Pu Lalduhoma chuan nimin khan Union Health Minister Pu JP Nadda chu a pisaah kawmin, Zoram Medical College & Hospital tihhmasawnna tur chungchang a sawipui
2. National Highway 306 leh 06 thawmthat mek hna chak zawka a kal theih dan tur sawiho in nimin khan Kolasibah DC Pu Robert C Lalhmangaiha kaihhruaiin meeting neih a ni
3. Mizoram atangin nizan khan Rashtrapati Bhavan-ah Pu R.Lalrawna chuan Literature & Education huangah Padma Shree a dawng..
4. India-in firfiakte laka ngaihnathiamna a neih loh zia puang zar tura Parliament Member palai tirh ten khawvel hmun hrang hrang an tlawh kual zel a.

<><><>

CM

Mizoram mamawh buaipuia Delhi-a cham mek Chief Minister Pu Lalduhoma chuan nimin khan Union Health Minister Pu JP Nadda chu a pisaah kawmin, Zoram Medical College & Hospital tihhmasawnna tur chungchang a sawipui.

Chief Minister chuan, PM-ABHIM hnuaia sak mek ZMC & H a Critical Care Block chu zawhfel tep tawh a nih thu Health

Minister hi a hrilh a, Critical Care Block hi a nihna tur ang taka hman a nih theih nan hnathawktu tur doctor, nurse leh a dangte lakna tur sum cheng Vbc 21.63 chu pe chhuak turin a ngen a ni. Health Minister hian Cabinet Memorandum siama Cabinet Meeting-in a ngaihtuah tura a lo chhawpchhuah thuai tur thu Chief Minister hi a hrilh a ni.

Nimin vek khan Chief Minister Pu Lalduhoma chuan Finance Commission 16-na Chairman Pu Arvind Panagariya chu a pisaah a tlawh a,

Chief Minister hian kum lo kal leh tur atana Mizoramin 16th Finance Commission hnena Mizoram mamawh a thlen hrang hrangte a sawipui a, heng zingah hian Thenzawl a Peace City Project te, Bana Kaih (Handholding) Scheme bakah Village Council ten fund tha zawk an hmuh theihna tura rawtna te chu ngaipawimawh sak turin a chah a ni.

(DIPR)

<><><>

SOCIAL WELFARE MINISTER

Social Welfare Department leh Directorate of Ayush tangkawpin a thlawna kum upa leh ruihhlo ngai , rilru lam harsatna neite tan inentirna chu Dawrpui Multipurpose Centre, Aizawlah buataih a ni a,

Nimin khan Social Welfare Minister Pi Lalrinpuui chuan hawngin thu a sawi a, ruihhlo ngai te chu ram hmelma leh misual an ni lo a, anmahni ringawta talchhuah an harsat avangin puitu an mamawh tih a sawi.

Minister chuan ruihhlo ngai tam tak, thlanmual leh hmun hrang hrangah an punkhawm thu leh a khawngaih takzet thu a sawi a. Ruihhlo avanga harsatna tawkte enkawl dan tur pawh tunhnaiah sorkarin ngawrh takin a ngaihtuah tih a sawi a. Ruihhlo ngai te lo tuamhlawmna tur hulhliap ruahman tum a nih thu leh hetah hian lo bual fai a, chaw ei tur te lo pek an nih dawn thu a sawi a. Ruihhlo avanga harsatna chu sorkar, kohhran, home leh pawl ang chauha chinfel theih a nih loh thu a sawi a, kawng hrang hranga tangruala beih a ngai a ni a ti.

Byte of Minister

Minister chuan an sorkar tirhah kum upate hamthatna dawn thin tihpun chu an intiam anga an tih hlawhtlin tawh thu a sawi a. Kum upa te tana Zoram nuam chu ban phak maia awm a nih thu sawiin sorkar chuan theihtawp a chhuah zel dawn thu a sawi a ni.

Mizoram Upa Pawl President Pu Nghaklianmawia chuan Akashvani zawhna chhangin kum upa te tana a thlawna mental health clinic buatsaih a ni chu lawmawm a tih thu leh, chin zui zel chi a nih thu a sawi a. MUP member te chu a chhawr ber tur an nih thu a sawi a ni.

Byte of Nghaklianmawia, MUP President

Free Mental Health Clinic puala inkhawm tawi buatsaihhah hian kum upa te hamthatna hrang hrang leh kum upate enkawl dan chungchang inzirtir a ni a, rilru hriselna, AYUSH

chungchang leh ruihhlo hman sual leh a kaihhnawih chungchang inzirtir a ni baw, vawiinah inentirna hawn chhunzawm a ni ang.



ZPM PRESS CONF

ZPM party thupuangtu Pu K. Laltluangkima’n sorkarin sawhthing chu kumin June thla thleng a la lei zel dawn a ti .

Nimina Aizawl Press Club-a chanchinbumite kawmnaah he thu hi sawiin Pu K. Laltluangkima chuan ZPM chuan Sawhthing chu an buaipui nasa tih sawiin khawvel puma rate chhia vanga an buai thu leh vanduaithlak an tih thu a sawi a. Sorkar chuan kumin June thla thleng a la lei zel dawn a, tunah pawh a lei mup mup mek reng thu a sawi a ni.

Pu Laltluangkima chuan sawhthing lei chungchangah khaw hrang hrang zingah thu awih deuhin an vanneihpui a, khaw thuawih lo deuh chuan an tuar a ti a, sorkar thu awiha sawhthing chawh theih hun an tiha cho thin khuain an hlawkpui ni a sawiin, Hun lo kal zel turah pawh loneituten sorkar thu ngaihchan thiaman thu awih a pawimawh tih sawiin Sawhthing lei runpui chu vawikhat tihna a nih thu leh hei hi mel lung pawimawh Mizo mipui ten an hriat reng tawh tur a nih thu a sawi a.

Tun hma ngaihtuah chuan hmasawnna nasa tak a nih thu sawiin duhthu anla sam tawkhloh lai erawh a awm a ti a, an kalphung chu a kum tela a that chhoh zel an beisei thu a sawi baw.



MEETING ON NH

National Highway 306 leh 06 thawmthat mek hna chak zawka a kal theih dan tur sawiho in nimin khan Kolasibah DC Pu Robert C Lalhmangaiha kaihhruaiin meeting neih a ni a,

DC chuan kuminah fur a intan hma avangin NHIDCL in kawng thawmthat hna an thawh pawh nasa takin a nghawng a, chumi piahlamah an kawngpui siam tawhsa pawh hmun tamtakah

a chhe leh tawh a, hengte avang hian kawngpui tha an neih theih nan theihtawp a an tan ho angai a ni, a ti.

He meeting ah hian NHIDCL aiawhten kawng siam meka an hnathawh dan leh harsatna an tawhte an tarlang a. Sum sanction awm lo chu an harsatna ber a ni tih sawiin, sum release hma in contractor thenkhatte phei chu mipuite mamawhna avangin, inbiakna neihpuia hna an tan tir te pawh an awm thu an sawi a. Tunlai khawchhia in kawng siam a tih hautak thu sawiin, ni hnih thum ruahsur lova a awm chuan an kawng siam chuan nasa takin hma a sawn dawn a ni, an ti. Heng bakah hian Khamrang leh Kawnpui inkar PWD enkawl mek pawh NHIDCL kuta hlan fel a ni tep tawh a, hlan a nih rualin hna an thawk tan nghal dawn a ni, an ti. Balaji Construction Company te pawhin report pe in thawmthat ngai lai te an thawmtha zel dawn a, amaherawhchu kan ram leilung nghet lo lutuk avang leh a innghahna tihngheh a nih loh chuan a tha rei thei tak tak dawnlo a, chumi tihngheh na tur chu an estimate ah a tello a ni, an ti.

Thutkhawmna ah hian Kolasib a sorkar thuneitute bakah Vairengte, Khamrang leh Kawnpui khawtlang hruaitute, Sub-Hqrs YMA President leh Secretary, MJA Kolasib District aiawhte leh Kolasib District Truck Owners and Drivers Association te an tel a.

Pawl hrang hrang aiawh lokalte hian Kawng dinhmunah chuan an lungawiloh thu sawiin, hun rei tak atanga an lo khel tawh angai leh ngai ngawta a awm thin chu pawl an tih thu sawiin, kawng tha an neih theih nan sawrkar leh NHIDCL lam ten tun atanga theihtawp an chhuah ngei an duhthu an tarlang bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

OBESITY

National Health Mission Consultant Dr. C. Remsangpuii chuan Mizoteah thisen thau awm zat tehna, lipid profile sang an tam thu leh hei hian taksaah thau chhia siamin mihring nihphung tur aia rit, overweight leh obesity a siam thu a sawi.

Akashvani zawhna chhangin Dr. C. Remsangpuii chuan thisena thau tam Mizoteah an tam zel thu sawiin hemi tehna, lipid profile test-ah hian thau chhia leh thau tha tam zawng teh thin a nih thu a sawi a, taksa mil aia thau ngah chuan mihringah harsatna leh natna hrang hrang a siam theih thu a sawi a ni.

Dr. C. Remsangpuii chuan tunlaiah mi tam takin awmhmunah hna an thawh tawh bakah ei leh in khawlaia siam, junk food mipuiten an ei nasa a, mei zu an tam bawk tih sawiin, heng hian thisena thau chu a ti tam thin a ni a ti a. Mi, thau uchuak, obese an nih leh nih loh chu body mass index (BMI) atanga teh a ngaih thu a sawi a. Hei hi san zawng mila taksa rih zawng dik hriatna a nih thu a sawi a, WHO guideline mil chuan body mass index 25 chung chu overweight a nih thu leh 30 chung chu obese tia sawi theih an nih thu a sawi a. BMI tha tak nei turin ei leh ina fimkhur tur leh taksa che tam a, in uluk turin mipuite a ngen a ni.

<><><>

PADMA AWARD

Mizoram atangin nizan khan Rashtrapati Bhavan-ah Pu R.Lalrawna chuan Literature & Education huangah Padma Shree a dawng. President Droupadi Murmu-I chuan nizan khan ramchhunga civil mite chawimawina Padma award hrang hrang a sem a. Heng chawimawina te President chenna Rashtrapati

Bhavan-a inkhawm buatsaihah sem a ni a. Padma Award hi chi thumah then niin a sang ber hi Padma Vibhushan niin Padma Bhushan leh Padma Shree ten an dawt a ni. Padma award dawng turte hi art, social work, public affairs, science leh engineering, trade and industry, medicine, literature and education, sports, leh civil service lama mi hmingtha thlanchhuahte an ni a. Kuminah hian Padma Award dawng turin mi 139 thlan an ni a. Heng zingah hian Padma Vibhushan 7, Padma Bhushan 19 leh Padma Shree 113 te an ni a. Heng zinga 71 hi kumin kum tir lam khan lo sem tawh a ni a. Nizan khan Padma Award 69 sem a ni a. Chief Justice of India hlui Jagdish Singh Khehar leh Kumudni Rajnikant Lakhia te chu Padma Vibhushan hlan an ni a. Justice Khehar chuan Padma Vibhushan a dawng chu ropui a tih thu a sawi.

<><><>

DELEGATES

India-in firfiakte laka ngaihnathiamna a neih loh zia puang zar tura Parliament Member palai tirh ten khawvel hmun hrang hrang an tlawh kual zel a. JD (U) MP Sanjay Jha-a kaihhruai all-party delegate te chuan nimin khan Singapore Foreign Minister te, MP, Chamber of Commerce leh sumdawng liante kawmin firfiakte laka India hmalakna te an sawipui a. Hetihlai hian DMK MP Kanimozhi kaihhruai palaite chuan Slovenia National Council President Marko Lotric hmuin India in firfiakte laka zahngaihna awmloa hma alak tur thu leh operation Sindoor neih anih hnua kalphung thar an siamte an tarlang a ni.

BJP MP Ravi Shankar Prasad-a kaihhruai palaite chuan France ah hun hmangin chanchinbumite an kawm a. Pu Prasad-a chuan Pakistan-in firfiakte an tanpui thin chu titawp tura intiamna an neih ngei a tul thu a sawi a ni.

<><><>